

**Piffissami 31. julimiit 10. augustip tungaanut Katerisimaartarnernut, ininut kikkunnit tamanit iserfigineqarsinnaasunut killilersuigallarnernit pillugit Namminersorlutik Oqartussat nalunaarutaat nr. 34, 30. juli 2021-mersooq Atuussimasoq (Historisk)**

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allangortinneqartumi, § 12 b, 21 B aamma § 29, imm. 2 aamma imm. 3 malitsigisaannik aalajangersarneqarpoq:

*Atuuffia*

§ 1. Nalunaarut Kalaallit Nunaat tamakkerlugu atuuppoq.

*Imm. 2.* Nalunaarut Kalaallit Nunaanni Peqqinnissaqarfimmut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaannermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

*Imm. 3.* Nalunaarut katersuunnernut, politikikkut allatulluunniit isummersornissamik sunniiniarnissamik siunertalinnut atuutinngilaq.

*Imm. 4.* Nalunaarut eqqartuussivinnut atuutinngilaq.

*Imm. 5.* Nalunaarut namminersortunut pisortaniillu ulluunerani neqeroorutitut, atuarfinnut, ilinniarfeqarfinnut il.il. nappaatit tunillaassortut akiorniarlugit iliuutsit pillugit Inatsisartut peqqussutaanni § 22 naapertorlugu atuutinngilaq.

*Imm. 6.* Nunatsinni Nakorsaaneqarfik nalunaarummit immikkut akuersissuteqarsinnaavoq.

*Init ilaannut taakkununnga attuumassutilinnut nunaminertanut, kikkunnilluunniit iserfigineqarsinnaasunut tunngatillugit piunasaqaatit*

§ 2. Inuit imm. 2-mi taaneqartuni inineeqqusaanatillu taakkununngalu attuumassutilinni nunaminertaneeqqusaanngillat, eqqaassanngikkaanni:

- 1) Covid-19-imut tamakkiisumik kapitissimasut, imaluuniit
- 2) annerpaamik akunnernik 48-nik pisoqaassusilik COVID-19-imik tunillatsissimannginnermut uppersaammik takutitsineq.

*Imm. 2.* Init taakkununngalu attuumassuteqartut nunaminertat kikkunnilluunniit iserfigineqarsinnaasut aamma nalinginnaasumik inunnit sivikitsuinnaanngitsumik isersimaffigineqarsinnaasut imm. 1-imut ilaatinneqarput, assersuutigalugu:

- 1) Sutorniartarfiit, cafiit, imerniartarfiit, diskotekit assigisaallu aamma tamakkununga attuumassuteqartut silami nunaminertat.
- 2) Pisortat kulturikkut suliffeqarfiutaat - tassunga ilanngullugit ilaatigut Kulturikkut Illorsuit, filmeriartarfiit, katersugaasiviit inersuillu saqqummersitsiviit.
- 3) Innuttaasut Illui assigisaallu
- 4) Atuakkanik atorniartarfiit.
- 5) Illut iluini silamilu timersortarfiit - tassunga ilanngullugit ilaatigut init timersortarfiit aamma Illorsuit Timersortarfiit, naluttarfiit, timigissartarfiit isikkamillu arsaattarfiit.
- 6) Nujalerisut, tagiartuisartut, pinnersartarfiit assigisaallu.

*Imm. 3.* Init tamakkunungalu attuumassuteqartut nunaminertat tullinnguuttut makku imm. 1-imi piumasqaatinut ilaatinneqanngillat:

- 1) Init tamakkunungalu attuumassuteqartut nunaminertat niuertarfittut atorneqartut.
- 2) Allakkeriviit.
- 3) Mittarfiit
- 4) Pisortatut oqartussani pilersuiffiusunilu init sullissiviit, saaffiginnittarfiit il.il.
- 5) Pisortat angallassissutaannut tunngatillugit utaqqisarfiit.

*Imm. 4.* Inuit tullinnguuttut makku imm. 1-imi piumasqaatinut ilaatinneqanngillat:

- 1) Sulisut inini pineqartuni imaluunniit tamakkununga attuumassuteqartuni nunaminertani suliallit.
- 2) Inuit Covid-19-imut akiuussutissamik kapitinnissamut Nunatta Nakorsaaneqarfianit nalinginnaasumik innersuunneqanngitsut.
- 3) Inuit 17-inik ukiullit ukiukinnerusulluunniit.

**§ 3.** Inuk Covid-19-imut tamakkiisumik akiuussuserneqarsimasutut isigineqassaaq inuup akiuussuserneqarsimanerup ingerlarngata naammassisimaneranik uppersaasinnaappat.

#### *Inuit pillugit paasissutissanik suliarinninnerit*

**§ 4.** Nalunaarut taanna naapertorlugu inuit pillugit paasissutissanik suliarinnittoqarsinnaavoq, inuit akiuussutissamik kapineqarsimaneranni killiffiup misissorneqarnissaa pisariaqartinneqarpat.

#### *Iliuuseqarnerit*

**§ 5.** § 2-mik unioqquutitsisoq Pinerluttulerinermik Inatsit naapertorlugu pineqaatissinneqarsinnaavoq.

*Imm. 2.* Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

§ 6. Nalunaarut ulloq 31. juli 2021-mi atuutilissaaq.

*Imm. 2.* Nalunaarut malillugu killilersuinerit, inerteqquteqarnerit, peqqusinerit il.il. 10. august 2021 ilanngullugu atuutissapput.

*Namminersorlutik Oqartussat, ulloq 30 juli 2021*

Kirsten Fencker  
Peqqinnissamut Naalakkersuisoq

/ Aka Olesen